



O le alofa lava i le manu e

Levi Tavita

“O le alofa lava i le manu e
Fa’alele Fa’alele Fa’alele”

Aiseā le alofa i le manu ae le o se tasi mea? E tele ni taofi, ae manatu alii fatusolo e to'aluā ma aupito ta'uta'ua a Egelani, e mafua talu ai o manulele e sili ona moni o latou alofa. O manu o ni faatusa o le alofa faamaoni i le lalolagi.

O lo'o pu'epu'emaui i upu o le pese o i luga pelega o le upu manu ia Samoa anamua, a o ta'aseu tamalii i le vao e saili le lupe e peisea'i o le sailiga o se tausala. O tala i seuga a aliiseu ta'uta'ua, e atagia ai le o'oga o pelega, i le agaga tausili ma le fa'atautavā. O ai na te maua le lupe mua o le seuga, o ai fo'i e tele manu i lana titi.

O le tala i le seuga a Lefaoese ma Ulumū o se fa'ata'ita'iga lelei ma lausilafia. Fai mai ua fa'alele maunu ona ave lea le fa'aaloalo a le alii Savaii i lana uo asiasi e seu muamua. Ua misi lana seu ae maua e Ulumū ae lei faailoina ona o le tualalo a lana uo seu. Ua maua le lupe a lana uo ona galo lea ia te ia le tulafono o le fa'atau fa'aaloalo. Tainane faiva o tamalii, e leai ni faaaloalo pe a malosi le fia muamua.

E leai se manu a Samoa e sili lona aulelei ma moomia e pei o le lupe i lona vao ituaiga. Atili ai o se manu e nofo mamao ese, e filemu, e le femioa'i ma ta'aga masani a manu, e iloga i lo latou 'au'aumamā ma le matagofie i le va'ai. La lea e le faigata ona iloa le so'otaga o le ata ma upu e fatu i ai. A manuia se faamoemoe ona faapea lea le tuua, Ua matalupe le asō. Ae a leaga ona lau lea le matape'ape'a o le matai. I la tatou laufatu o le alofa, e tumu la tatou titiula i ata onomea o sea manu.

Ae le na o Samoa, ua loa foi le faaaoga e tusitala Europa ia latou fatufatuga. O le mau a le tala faasolo e faapea o le alii fatusolo Egelani o Chaucer na muamua lava tusi sana solo e faatatau i le Aso o Valenitino, e ta'u ai le lupe ma ona foliga manaia. Afua mai ai isi ata ma le vaogagana e tumu ai le gagana Peretania. Ae le ta'ua isi gagana sili atu le matutua.

E pei fo'i o fatu'upu Samoa i na vaitau, sa fiafia i ata faatusa o seuga i le vao ma le sami. Ua fa'atusa le tama'ita'i i le lupe, po o le i'a o loo tuli e le tautai. E pei ona pu'epu'emaui i upu o pese, faaualoa i ata o tala lausilafia; e iai lona i se aloali'i seulupe ma se 'auuso tama'ita'i. Aumai ai se ata manaia o le manu o loo sailia (lupe) ma lona faatusa tagata (tama'ita'i) faatasi ma le o loo saili (tulimanu).

E le filemu valea uma lupe e pei ona molimau le tala. E iloa fo'i e le lupe fika mai le pese i le o loo alu atu e tuli ia. Ae potofoi le seulupe ia e tali. E ta'u mai ai e le o se faiva e faapa'ole lona faiga. E alu tapena le tagata tutuli, tainane fo'i lupe o loo faatali mai.

Ae a o'o ina filifili le vao ma faigata le gagana ona tosi lea o le laina i le e fou i le ta'alogaga ma le ua agavaa. Ina ua avatu le poloa'i a Puleleiite i lana uo o Malietoa e sau ma aumai se tula o lana lupe, na le'i mate'ia e le alii le uiga i le vaifetalaiga. Aisea na le ta'utino ai Pule o ia e mana'o i se lupe ae le o se tula? Pe ona o lona fa'aaloalo tele ua 'alo ai i le ata ae nana le 'auga tonu o lona mana'o— o sona to'alua?

E molimau talatu'u, e faitau aso faitau masina e ta'aseu ai tamalii i le vao ona o le tuliga o le manu. E leai se tasi e

naunau e fo'i fua. Afai ua siliga i le ma'i o le tina le tatau ona fo'i— ae le ta'ua le maumau e iu i ai, ona tatou malamalama lea i le tulaga moni, e pei ona aumaia le tala ia Tupuivao e fai ma se fa'ata'ita'iga.

A o tala i le matalasi o le alofa lava ia e mafua ai mea uma, e leai sona tuaoi e pei lava o le agaga o le Aso. E pei ona tusi le Aposetolo, o le alofa e le musu gofie, e le fo'ifua tainane o oe o se tupu e tapui i sa ma mamalu. Aumai le tala ia Salamasina e fai ma faata'ita'iga.

Faatusatusa lea ma le tala ia Romeo ma Iulieta, faatusa o le alofa o talavou, e le mataofiofi; e ese mai i lena e faufau pei o le tupu Eperu na soli le poloaiga ona o le mana'o fua i le manu a le isi aiga; e le logo malie sona faaiuga e pei o lena ia Lopepe ma lona faiva uiga ese; ia ma le fuā e o faatasi; e pei o lena o se tamalii Samoa na ia tulituliloa si alii na ulua'i alofa i ai lana lupe. Ae faafefea ona faamatala le alofa o se lupe i lona uso na ia faasoa i ai fo'i lana tane?

Ae a le alofa o le lupe e ufiufi e tau i le oti, e foa'i lona ola e sui ai lana uo e pei o la le Alii Faaola!

Tele fatuga matagofie a le lalolagi i le alofa ae sili ia te a'u na a le Tusi Tuai ma alofagia, le tala ia Ruta ma Eseta ma Iakopo ma Iosefa ma le lisi e le uma. To'atele e talitonu o le Pese a Solomona o se faaleoga aupito mamā ma matagofie o le alofa mo tupulaga e tatau ona faitauina. A o ai sē e le faaga'eina i le valaau a le tulimanu: 'Auā, faauta mai ia, ua mavae le tau maalili, ua uma timuga. Ua iloa atu fuga i le

fanua, ua o' mai le tau e teuteu ai vine; ua lagona fo'i le leo o le lupe i lo tatou nuu.' (Pese a Solomona 2:11-12).

O le sailiga i le alofa o se mea e le gata ae fa'aaauau pea. E le mo na'o manu laiti o loo tau saili a o manu matutua fo'i ua loa ma mafana mafutaga— ma e ua toe saili.

I le solo ta'uta'ua a Geoffrey Chaucer, O le fono a manu, Parliament of Fowls, o loo ta'utino ai le lupe po'a (alii) e faapea, afai e maliu lona aiga (lupe fafine), e le toe faia se isi ona to'alua. O le ta'utinoga o le faamaoni e masani ai manu ua moni le fealofani— ma le tautoga sa fai i le Alii. I le o lea o le vaitau e foa ai tautoga, e faafou ai ta'utinoga, ma toe faaolaola le uluai alofa i sina mafanafana faaopopo.

O le sailiga ma le naunauta'i i le pa'aga e gata ai, po'o se tutusa loto, o le tupua e taumate. O ai na te iloa le ala i le loto o le tasi? E lelei le tupu e fai lona faletautu, e le tigaina e tau saili. I nei fo'i aso a tele au tupe e o mai lava lupe latou ma mau i lau upega. Ae e le mafai e tupe ona fa'ailoa mai le e alofa moni ia oe ma le e alofa i au tupe.

Ae na iloa e Paulo le fili ae e le'i aliali mai, e mafua ai lana tomatou, e lelei le faaipoipo ae leaga le mana'o. Auā o ai se na te lavā tete'e atu i le pa'ō leotele a le faitoto'a pe a tu'itu'i faalua mai!

E to'atele le 'auseu faalepopoi ua manu'a ai loto, ae le tatau ona faia'ina ai le agaga saili. Tatou te fa'atali teisi, po'o afea e toe tu'itu'i ai le faitoto'a o o tatou fatu. Pe tatala pe leai? O le fesili lena— fai mai ai le fatusolo.

I lenei vaiatau o le alofa ma le fealofani o manu i uluulu la'au atonu e maua ai se faaiuga. Afai e toe tatala lou faitoto'a ae oso mai o se isi fo'i pe'a vao, ia 'aia e te ita o le taaloga e tigaina, a ua tatau ona e iloa fai se 'afu o manu faapeaina. Ae a oso mai o se lupe, faitau lena o lau meaalofa mai ia Sagato Valenitino.

Ae afai e te le gae'e lava oe i tupua ma taumatega alofa a manu, atonu la o lou alofa e mo agelu ma sagato, ma isi mea e sili atu.

LPS Tavita © 2016